



百  
一  
集

五十七五十八

~ 16  
2690  
29





白居易長慶集卷第五十七

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

翰林制誥四 凡六十八首

荅元義請上尊號表

朕自君臨運逢休泰時歲豐稔兇醜殄夷此皆宗社降  
靈忠賢宣力顧惟寡德敢受鴻名卿中發懇誠上尊美  
號雖屬人望難貪天功宜悉所懷勿固為請

荅薛萃賀生擒李錡表





門へ16  
號 2690  
卷 29

白集

卷五十七

朕自嗣耿光每多惕厲念必先於除害志無忘於安人  
李錡大負國恩自貽天罰師徒未動於疆場音父子俱  
肆於市朝信上天之禍淫與率土而同慶省視來表深  
鑒乃誠所賀知

與薛萃詔

勅薛萃楊君靖至省所陳謝具悉卿勤王之節徇公滅  
私事主之誠移忠資孝苟非褒贈何以顯揚且清白之  
風既自家而刑國則寵旌之澤宜因葉以流根式遵追  
遠之經用表教忠之訓是為禮典煩致謝章

與嚴礪詔

昭和九年  
十一月二日  
購求

勅嚴礪薛光朝至所陳謝具悉卿徇公竭誠臣節克著  
揚名濟美子道有光教忠既本於義方追遠宜崇於禮  
命俾優褒贈爰慰孝思秩貴冬官以表過庭之訓封榮  
石筵居效切用旌徙宅之賢雖示新恩允符舊典遠煩陳  
謝深見懇誠

與餘慶詔

勅餘慶省所謝陳具悉卿累居冢職時謂盡忠自尹洛  
師日聞報政臣節既彰於宣力子道莫大於揚名俾光  
孝思爰舉禮命榮褒冢宰寵賁幽靈式是靈章豈為私  
渥有煩陳謝深見誠懷

白集

卷五十七



答黃裳請上尊號表

朕以薄德嗣守不圖不敢荒寧以弘理道幸屬歲時豐稔兇寇梟夷風雨不愆禮圓丘而報本雷霆未震豐<sub>切與</sub>馴致和平永惟弘名實懼虛美卿上稽祖訓下酌羣情陳獻表章請加徽號暨于王公卿士降及耆艾繼黃咸一乃心各三其請朕嘗以宰元化者曲成於物法天道者從欲於人雖恤隱泣辜未臻三五之化而樂推欣戴難違億兆之心德非稱焉讓不獲已勉從所請深愧于懷

與從史詔

勅從史楊幹至省所奏公月七日到潞城縣降雪尺餘兼奏耆老等詣闕請欲立碑并手疏通和劉濟本末事宜者具悉卿分朕之憂求人之瘼時降大雪豐年表祥豈惟澤及土田將使物無疵厲休慶斯在慰望良深耆老等遠詣闕庭請立碑記尋已允許當體誠懷以旌政能無至陳讓知卿協比其鄰翼戴為意陳此手疏發於血誠忠懇彌彰嘉嘆不已永言臣節何日忘之想宜知悉

與韓臯詔



勅韓臯省所陳賀具悉卿朕自守睿圖每思寬政慮先  
禁暴念在措刑李錡負國反常阻兵于紀未勞師旅已  
就誅夷卿宣方納忠秉心嫉惡遠陳慶賀深見懇誠想  
宜知悉

與元衡詔

勅元衡卿立身許國竭力匡君人之具瞻予所嘉賴凋  
殘是卹遠藉宣風之能利澤所資暫輟爲霖之用慈和  
旣敷於兵後惠信當洽於言前永念忠勤豈忘寤想計  
卿行邁已到西川涉遠冒寒固甚勞頓勉加綏撫以副  
朕懷想宜知悉

答李扞等謝許上尊號表

朕自臨萬邦僅經三載位雖託於人上化未洽於域中  
永念眇身敢當大號卿等義深宗室忠盡君親一其情  
誠三有陳獻迫以人望厭于天心遂抑所懷勉從其請  
固辭而事非獲已撫德而何以堪之再省謝章彌增惕  
厲

答馮伉請上尊號表

朕統承太寶時屬小康伐謀而吳蜀克清示信而華夷  
有截斯皆宗社垂祐天地降和非常冲人所能馴致卿  
上稽十聖之訓下酌萬人之心以爲不讓強名未傷於



體道屈已循物何爽於至公遂抑素懷俯從衆望雖鴻名未稱每勞躋地之心而人欲不從即爽法夫之德勉依勤請良用愧懷

荅長安萬年兩縣百姓耆壽等謝許上尊號表  
朕每念雍熙庶未及於億兆永言徽號讓已至于二三而文武具寮緇黃庶老懇陳誠欵明引訓謨開予以天地無私之心起予以聖宗不易之訓以太道者無求於物物尊而不辭至公者非欲其名名立而不讓迫於固然之禮不得已而許之卿等誠至感通義深欣戴再煩陳謝益用愧懷

荅元素謝上表

卿用兼文武識合變通輟綱領於中朝授麾幢於外闕吏能足以惠物將略足以董戎人望所歸予心是賴知卿已到本鎮當慰疲人深藉撫綏之方以安凋弊之俗日期報政歲望成功勉勤所圖用副朕意

荅韓臯請上尊號表

銷沴致和幸逢昌運加名建號豈稱眇身而文武具寮黎獻庶老引古今之明訓陳億兆之懇誠謂德有所歸謳詞不可以苟讓謂功有所獻徽號不可以固辭遂抑中懷俯從衆望庶增修乎茂實冀允副於鴻名卿發誠



自中歸美于上勉依所請彌愧于心

荅馮伉謝許上尊號表

朕以眇身嗣于丕業心雖勞於惕厲化未及於雍熙永  
惟強名實懼虛美上自一二元老下及億兆黎人大洽  
詢謀明徵典訓增予以巍巍之號感予以顛顛之誠既  
迫所懷俯從其請卿義深奉上志切戴君再省謝陳彌  
增愧惕

與顏証詔

勅顏証戴及至省所賀及謝王國清充五嶺監軍具悉  
卿職在撫綏任兼備禦公勤夙著聞望日彰言念于懷

豈忘寤寐乾象昭感壽星垂文與時相膺有道則見  
慙非德何以當之卿戎旅事殷宜有監領益為常例煩  
至謝陳想宜知悉

與從史詔

勅從史省所陳謝追贈亡母并舉薦章悅具悉卿推誠  
奉國積慶成家既彰盡節之忠宜洽流根之澤雖祿難  
逮養已闕靈於九原而孝在顯親宜旌賢於三徙俾崇  
封贈以極哀榮章悅既有才能又所諳委卿即發遣令  
赴闕庭卿之忠誠朕所識察豈待陳露然後知之載覽  
來章益嘉懇切想宜知悉



與季安詔

勅季安省所陳請具悉卿朕慕承鴻業司牧蒼生僅致  
 小康未臻太化實慙薄德未稱崇名而華夷兆人內外  
 羣后屢有勤請難於固違卿遠獻表章明徵典訓納忠  
 於歸美於君勉從懇誠良用愧悵儲貳者上繼宗祖下  
 負那家心豈暫忘事或未暇尚阻來請宜體所懷

與高固詔

勅高固卿奉國戴君必竭忠節統戎護塞克著勲勞自  
 領藩垣委之心膂忠懇之志久而益彰欽歎在懷何嘗  
 暫忘以卿一從軍旅多在邊陲歲月積深勤勞滋久所

宜出入中外周旋寵光今授卿檢校尚書右僕射御史  
 大夫兼右羽林軍統軍以端揆之崇兼環衛之帥遂卿  
 望闕之戀表朕念功之心仍賜卿官告卿宜即赴闕庭  
 想宜知悉

祭故贈婕妤孟氏文

維元和二年歲次丁亥十一月甲寅朔十九日壬申皇  
 帝遣某官某以庶羞之奠致祭于故婕妤之靈曰惟爾  
 和順積中柔明奉上動靜合肅離之體進退得婉變之  
 儀選自良家備茲內職修令顏以顧德蘭幽有香守明  
 節而保身玉潔無玷方資懿範以茂嘉猷彼美有聞于



何不淑遽茲淪逝深用側傷既上日晨爰申奠醑以爾  
有班氏之明智故贈以婕妤以爾有宓妃之姿容故葬  
於洛浦魂兮不昧歆此誠懷尚饗洛浦原在長安界

季冬薦獻太清宮詞文

維元和二年歲次丁亥十二月甲寅朔二十六日巳卯  
嗣皇帝臣稽首太聖祖高上大道金闕玄天元皇大帝  
伏以今年司天臺奏正月三日祀上帝于南郊佳氣充  
塞四方溫潤祥風微起廬州申連理樹一株彰義軍節  
度使進白鳥一鄭滑觀察使奏瑞麥五科司天臺奏六  
月五日夜鎮星見河陽節度使進白雀一荆南節度使

申連理樹一本山南西道觀察使申嘉承一枚司天臺  
奏六月十三日夜老人星見河南府申芝草兩莖司天  
臺奏冬至日佳氣充塞瑞雪祁寒者臣嗣承不圖肅恭  
寅畏祖宗垂慶佳瑞薦臻虔奉禋祥伏深祗惕今時惟  
玄律節及季冬仰薦明誠敬率恒典謹遣攝太尉司徒  
平章事杜佑薦獻以聞謹詞

與茂昭詔

勅茂昭盧校至有所奏請上尊號及建儲闈賀誅李錡  
并進馬者具悉卿朕以寡德祇嗣不圖雖致小康豈稱  
大號迫於人望遂抑予懷永惟強名實愧虛受儲貳者



上繼宗祖下貞邦家心非暨忘事或未暇尚阻來請宜體所懷李錡包藏亂心奮發兇德不勞征討自就誅夷想卿忠誠倍以為慰所進馬馴良可尚服御且聞取其戀主之心足表為臣之節再三省覽嘉歎久之想宜知悉

荅百寮謝許追遊集宴表

在昔哲王居于人上推其憂樂與眾共之頃屬三兇薦與二載連獲凡百有位咸一其心誠念嘉謀共致昭泰今四表無事三農有年思與羣情同其具慶是宜削苛察之前弊明寬裕之新恩仁及下而啓迪歡心澤先春

而導迎和氣昨逢多故主憂且使臣勞今致小康上安則宜下樂庶欲解人之愠粗伸推已之恩豈曰殊私煩於陳謝

荅李扞謝許遊宴表

朕自御萬方僅經三載運逢休泰俗漸和平當朝野無虞之時見君臣相遇之樂是故去滋彰之化弘優貸之恩近自宗親下及士庶賜其宴行遂以優遊蓋以已之所安思與人之共樂雖夕惕而若厲每戒志於無荒賜春遊以發生宜助時而有慶卿等榮崇宗寺恩重本枝省所謝陳彌嘉誠懇



答劉濟詔

勅劉濟省所奏茂照送卿管內百姓殷進能等七人奏  
 前後事由具悉卿為國大臣與君同體寬而得衆忠以  
 忘身每循公而滅私能虛懷以容物與茂照疆場音之  
 事小有違言曲直是非朕已明辯卿外崇藩翰內贊謨  
 猷念屈已以為心或難容忍思戴君而是力宜務叶和  
 勉卿寬裕之懷助朕含弘之化想宜知悉

與柳晟詔

勅柳晟上英琦至省所奏慶雲并進圖者具悉昌運將  
 開祥符先見發自和氣聚為卿雲捧日而五色相宣

天而萬物咸覩斯為嘉瑞宜契昇平朕方致小康未臻  
 大化受茲方貺祗惕良深卿以誠事君推美奉上獻輪  
 困於圖畫陳懇欵於表章披閱再三彌增嘉嘆

荅薛萃謝授浙東觀察使表

卿久踐吏途累聞能政及居藩鎮尤見忠勤訓導而羣  
 黎向方廉察而列郡承式實嘉乃績每簡予心宜遷雄  
 劇之藩以廣循良之化勉於為理副朕所懷所謝知

上元日嘆道文

道本無象功成強名生一氣之先為萬物之母吹煦寒  
 暑陰陽節而歲功成輔相乾坤上下交而生物遂故能



皇蕃動植啓迪雍熙邦家保安夷夏咸若今以時殷獻  
歲節及上元女道士某等奉爲皇帝焚香行道敬修功  
德伏願聲聞紫極丕降玄休大庇羣生永康四海流光  
巫慶億萬斯年

畫太羅天尊讚文

道用無窮統之者太聖神化不測感之者至誠非圖像  
無以示儀形非供養無以展嚴敬故一念一禮而福隨  
之畫大羅天尊者奉爲順宗至德太聖太安孝皇帝忌  
辰之所造也皇帝祖玄元之風嗣清淨之理志在善繼  
心惟孝思申命工人彰施繪事粹容儼若真相炳焉

志誠而上通至景福而下濟詞臣奉詔恭爲讚云  
眞通之象孝感之心率上瞻仰在天照臨蒼爲精誠發  
爲圖畫如從太羅應念而下

荅朱仕明賀冊尊號及恩赦表

朕以寡德嗣承睿圖俯從衆誠勉受鴻稱慶之大者豈  
在予一人推而廣之宜及爾萬姓爰因受冊之禮遂施  
作解之恩俾與羣生同斯太慶卿盡忠訓旅推美奉君  
省茲賀陳深見誠至

祭咸安公主文

維元和三年歲次戊子三月癸未某日皇帝遣某官某



以庶羞之莫致祭于故咸安太長公主觀濬毗伽可敦  
 之靈曰惟姑柔明立性溫惠保身靜修德容動中規度  
 組切五切紉切詳倫之訓既習於公宮湯沐之封遂開於國  
 邑及禮從出降義重和親承渥澤於三朝播芳猷於九  
 姓遠修好信既申協比之姻殊俗保和實賴肅雍之德  
 方憑福履以茂輝榮宜降永年遠歸長夜悲深計告靈  
 極哀榮爰命使臣往申奠禮故鄉不返烏孫之曲空傳  
 歸路雖遙青塚之魂可復遠陳薄醑庶鑒悲懷嗚呼尚  
 饗

與仕明詔

卿久鎮邊防初膺闕寄式旌勤効俾洽恩榮褒德念功  
 故進封以示寵忠誠亮節宜因實而錫名既表新恩亦  
 惟舊典今改封卿丹陽郡王仍改名忠亮勉勤乃事以  
 副所懷想宜知悉

與崇文詔

勅崇文段良玘至省所謝亡妻邑號具悉卿有濟時之  
 勳寵居衣職士政承積善之慶列在王官俾洽恩光故  
 加褒贈念梧桐之早落不及夫榮追芣苢之遺芳宜從  
 子貴式崇寵命以賁幽靈有茲謝章良用嘉嘆

祭張敬則文



維元和三年歲次戊子七月辛巳朔二十七日丁未皇帝遣某官某以清酌之奠致祭于故鳳翔節度使贈某官張敬則之靈惟爾挺武毅之質負將帥之才名以忠聞位由勤致自膺闔職益茂勳猷惠葺疲氓威吞黠虜一方膏雨千里長城繼博望之功勞能恢代業傳子房之籌略不墜家聲方誓山河遽捐館舍逝川無捨遠日有時微績空存書旗常而播美音容不見聽鼙鼓而增思永念忠勤彌深軫悼往陳遺真庶鑒悲懷嗚呼尚饗

與希朝詔

勅希朝劉忠謹至省所奏沙陀突厥共一千八百七十

人并駝馬器械歸投事宜具悉卿以將帥之才鎮萃夷之要憂勞為國忠勇忘家聲動寇戎塵清封略突厥等嚮風輸款率屬來賓雖慕我懷柔遠無不至亦因卿威惠導之使來念其歸投宜有優賜今賜衣服及匹段等自首領已下卿宜等第給付其部落家口等遠經跋涉宜稍安存以勸歸心用副注意

與元衡詔

勅元衡省所奏當管南界外生蠻東凌六部落大鬼王苴春等以所管子弟百姓等二千餘戶請內屬黎州并奏南路蕃界消息者具悉卿以文武之才兼將相之任



仁和下布黎庶獲安威惠旁流蠻夷率附勲勤斯著倚  
賴彌深欽矚之懷豈忘寤寐生蠻部落直春等久阻聲  
教遂此歸投願屬黎州請通縣道勉於撫慰以勸將來  
所奏蕃界事宜具已知悉戎虜雖聞喪敗封疆不可無  
虞亦宜隄防用副憂矚

與陸度詔

勅陸度省所奏當管新開福建陸路四百餘里者其悉  
卿望重周行寄分越徼嘉聞素著茂政累彰况勤可使  
人智能創物廢驚波之路開砥石之途捨舊謀新以夷  
易險財力不費商旅斯通惠既及人動非獲下績用可

尚欽嘆良深

荅盧虔謝賜男從史德政碑文并移貫屬京兆

表

卿男從史為國重臣自領大藩厥有成績公忠茂著政  
理殊尤勒石所以表勲賜文所以褒德惟功是念有善  
必旌是國舊章非予私渥昨又請移鄉貫願隸京邑家  
聲益振臣節逾章雖清望標門崇冠山東之族而丹心  
戀闕恥為關外之人載省懇誠彌深嘉嘆所謝知

與宗儒詔

勅宗儒卿邦家楨幹班列羽儀嘗作股肱弼諧無怠及



司管箴鎮靜有方欽重之懷寢興不捨春宮之長非賢  
不居既簡朕心亦得人望今授卿禮部尚書并賜官誥  
往除餘慶東都留守卿宜便與交割即赴上都想宜知  
悉

與希朝詔

勅希朝省所奏党項歸投事具悉卿邊隅寄重關外事  
繁威行而軍聲外揚信及而戎心內附動皆展効進必  
盡忠勞績彌彰倚望尤切党項拓跋忠敬等頃雖為盜  
今已經恩懼而歸投情可容恕許其後効以補前非卿  
宜安存無使疑懼其磨梅部落等尚能繼至亦許自新

宜加招諭令知朕意

與韓弘詔

勅韓弘任光輔至自所陳請具悉卿文武全夏邦家重  
臣自居大藩厥有成績輯寧百姓嚴整三軍使予無憂  
惟爾之力省茲章奏懇願朝宗誠嘉深衷難遂勤請朕  
以梁宋之地水陸要衝運路咽喉王室藩屏人疲易散  
非卿之惠不能安師衆難和非卿之威不能戢今衆方  
悅附人又知歸鎮撫之間事難暫輟雖懸深闕積十  
年而頗勞然倚為長城捨一日而不可免卿忠力布朕  
腹心宜體所懷即斷來表



荅杜佑謝男師損除工部郎中表

卿道贊謨猷功成輔弼師損克承訓義雅有令名豈惟  
賞延兼以能選班行久次頗積功勩郎署稍遷未為渥  
澤省茲章奏深見懇誠所謝知

與嚴礪詔

勅嚴礪省所奏進蒼角鷹六聯具悉卿任重列藩寄兼  
外閫事皆奉上動必竭誠時屬勁秋致茲警鷲調習成  
性進獻及時取其效用之能足表盡忠之節

與韓弘詔

勅韓弘卿苦心奉國極慮撫人惠彼一方于茲十載歷

展勸主之功累陳戀闕之誠才以任彰節因事著不  
殊寵何表成功夫外擁旌旄小牙之任重內參台衮股  
肱之寄深以爾一心投茲二柄永言倚賴當副誠懷今  
除卿同中書門下平章事依前宣武軍節度等使餘並  
如故并賜官告往想宜知悉

荅王鐔陳讓淮南節度使表

卿自領大藩累彰殊効惠安百姓表正一方雖戀闕誠  
深然殿邦寄切既執圭而肆觀宜返旆而勞旋况淮海  
要衝旌旄重任永言共理已有成功方注意於撫綏何  
瀝誠而陳讓難允來請宜體所懷



答韓弘讓同平章事表

致理之道審官為先以卿有文武之才故授卿以將相之任所冀外為藩翰張爪牙之威內贊謨猷宣股肱之力僉諧允屬眾望攸歸方注意於安危何執謙而陳讓所進官告今却賜卿無或再辭即斷來表

畫大羅天尊讚文

唐元和己丑歲四月十四日畫大羅天尊一軀成奉為睿聖文武皇帝降誕之辰所造惟歲之春惟月之望誕千年一聖之始降百祥萬壽之初電繞樞而夜明雷出震而時泰皇帝孝敬寅畏憂勤勞謙以謂無疆之休雖

肇自於元聖莫大之慶思廣被於羣生爰命國工俾陳繪事真相儼若玄風穆如疑從大羅感聖而降至誠上通於一德景福秀濟於萬靈休命耿光自茲無極詞臣承詔恭為贊曰

大羅天兮高不測浩無倪兮杳無極中有聖兮無上尊惟玄德兮可升聞圖相好兮仰高真誠上感兮福下臻俾百祥兮與萬壽配聖日兮而長新

答韓弘再讓平章事表

將相兼委實難其人非其德不可謬承當其才不在懇讓朕非虛授卿勿固辭宜斷來章即奉成命已具前詔



當體朕懷

書元始天尊讚并序

元者諸天之先始者萬靈之毋混而成一強以為名至哉無上尊得以是為號正月二十有三日德宗神武孝文皇帝上九仙之月遇八音之日也皇帝教弘玄訓業奉真宗承文祖之貽謀申孝孫之誠敬以謂元始天尊者真儀不遠隨相而生神用無方應念而至故命設繪素展儀刑五彩彰施七寶嚴飾所以表當宇之瞻仰感在天之聖神通玄應於希夷集靈祐於盼嚮許兩切詞臣承命跪唱讚云

玄聖何在天上天欲往從之宵無緣命工設色五彩官忽如真相見於前聖應聖兮玄又玄薦百福兮垂萬年

北齊驃騎大將軍高敖曹讚并序奉勅撰

高昂字敖曹渤海蓆他歷切人也姿體甚異膽力過人累經戰伐皆著功績官至驃騎大將軍儀同三司兼州刺史其勇敢忠壯冠于一時時稱為名將後竟以攻戰死於王事年四十八贈太尉諡曰忠武贊曰敖曹之容好配子羽生揚勳烈死謚忠武武不顧身忠不忘主誠哉選士無以貌取

與驃國王雍羗書



勅驃國王雍羌卿性弘毅勇代濟貞良訓撫師徒鎮寧  
 邦部欽承王化思奉朝章得睦鄰之善謀秉事天之明  
 義又令愛子遠赴闕庭萬里納忠一心稟命誠信彌著  
 嘉想益深今授卿檢校太常卿并卿男舒難陀那及元  
 佐摩訶思那等二人亦各授官告往至宜領之此所以  
 表卿勲勤申朕恩禮敬受新命永為外臣勉弘今圖以  
 副遐矚今有少信物具如別錄想宜知悉也冬寒卿比  
 平安官吏百姓等並存問之遺書指不多及

與季安詔

勅季安劉清潭至省所奏貝州宗城縣百姓劉弘為母

病割股充祭事宜具悉卿任重彌諧寄深鎮守勤恤  
 之政贊燮理之功至使部人忘身展孝雖因心有感誠  
 化我之時風而率下可知足表卿之理行省茲陳奏欽  
 嘆良深

荅杜兼謝上河南少尹知府事表

三川封畿實重其任貳職綱紀亦難其人卿素懷器能  
 累著聲績亞理以明慎選專領以展長才知已下車當  
 親綏撫佇聞報政用副憂勤所謝知

代忠亮荅吐蕃東道節度使論結都離等書

撰



大唐四鎮北庭行軍涇原等州節度使檢校工部尚書  
兼御史大夫丹陽郡王朱忠亮致書大藩東道節度使  
論公都監軍使論公麾下專使辱問悚慰良深國家與  
吐蕃代爲舅甥日修鄰好雖曰兩國有同一家至於封  
疆尤貴和叶忽在來問稍乖素誠雖有過言敢以衷告  
來書云頻見燒草何使如然者至如時警邊防歲焚宿  
草蓋是每年常事何忽今日形言况牛馬因風猶出疆  
以相及草木延火縱近境而何傷遽懷異端未敢聞命  
又云去年忽生異見近界築城者且國雖通好軍不徹  
警近邊修緝彼此尋常况城是漢城地非蕃地豈乖通

理何致深疑難言思之誰生異見頃當報牒彼已息訟  
今又再言寧無慙德又云皇天無親有德卽輔者皇帝  
君臨萬方迨茲四載道光日月德動乾坤南北東西化  
無不及若非皇天輔德明神福仁北虜何爲歸明南蠻  
何爲慕化風雨何因大順歲時何因屢豐則神助天親  
可明驗矣彼若無故生疑無端結怨但思小利不務遠  
圖則咎孽之生恐不在此末言取笑却請三思又云漢  
之臣下頻有叛逆者近以吳蜀小寇暫肆猖狂未及計  
除尋以殄滅皇威不露妖氛自清豈假彼蕃遠思傍助  
忠亮謬蒙恩渥叨在藩垣恭守邊隅幸鄰封壤縱未能



爲漢名將亦不可謂秦無人輒獻直言以祛深感願推誠信同保始終各勉令圖以求多福歲暮嚴寒惟所履安勝遠至惠貺愧佩殊深今因押衙迴亦有少荅信具如別紙恕輕書也不具忠亮敬白

與南詔清平官書

敕南詔清平官段諾突李附覽巽何棟尹輔首段谷普李昇傍鄭蠻利等段史倚至知異牟尋喪逝朕以義重君臣情深軫悼卿等哀慕所切當何可任又知閣勸繼業撫入輸誠奉教蒸黎咸又封部獲安皆是卿等同竭忠謀佐成休績永言及此嘉慰良深勉終令圖以嗣

矚今遣諫議大夫兼御史中丞段平仲持節冊命閣勸想當悉之卿等各有所信物具如別錄至宜頌也春寒卿等各得平安好遣書指不多及

荅王鏐賀賑恤江淮德音表

水旱流行江淮艱食朕明申詔旨親遣使臣蠲其逋租賑以公廩爰與利物之利用表憂人之憂庶俾疲氓均霑惠澤卿克勤乃職共理爲心省茲賀陳深見誠意

與茂昭詔

勅茂昭盧校至省所陳奏具悉卿翼戴君親出入將相久專戎閫累覲王庭忠勞必竭其智謀誠懇每形於章



表近者志在憂國慮及安邊請率精兵親防黠虜朕以卿當管軍鎮寄重事殷實藉撫綏用安封部雖未允所請而深嘉乃誠今又密奏恒州具申事體曲盡忠勤之節備知丹赤之心言念再三發於嗟嘆眷重之至併在予懷想宜知悉

與潘孟陽詔

勅孟陽卿夙懷才畧早振聲猷歷踐班行累彰績効自守關輔克舉藩條惠及蒸黎威行軍鎮永言所任未展其能朕以東川蜀門重鎮弊承軍後雄壓險中思得忠勤之臣撫此凋殘之俗量才注意無以易卿今授卿劍

南東川節度觀察使并賜官告往想宜知悉

荅宰相杜佑等賀德音表

古先聖王託于上與百姓同其欲與天下共其憂唯推是心可底于道朕臨御萬國迨茲五年惕厲之懷雖勤於夙夜愆伏之候猶害於歲時思革弊以救災在濟久而損已是用欽刑緩死責已郵省罷郡國之貢珍省官殿之煩費延春令而布仁行惠先南風而解愠阜財庶憑歡心以召和氣卿等或匪躬獻替或悉力弼諧啓沃之間已申霖雨之用瘳理之際佇見陰陽之和各宜勉之以輔予理所賀知



答宗正卿李詞等賀德音表

朕統承鴻緒子育蒼生累歲有秋今春不雨在陰陽之數雖有盈虛為父子之心敢忘惻隱俾除人弊以湯旱災卿等任重宗卿恩連屬籍省茲陳賀深見忠誠

答將軍方元蕩等賀德音表

朕以時陽外候春澤愆期思備旱之方無如貶省務動天之德莫若精誠是以修已卹人去煩節用興谷天戒以致時和卿志竭邦家職修軍衛省茲表章深用嘉之  
所賀知

與迴鶻可汗書

皇帝敬問迴鶻可汗夏熱想比佳適可汗有雄武之姿英果之畧統制諸部君長一方纂承前修繼守舊好故得邑落藩盛士馬精強連挫西戎永藩中夏况嚮風之義每勤於朝聘事大之敬常見於表章動皆由衷言必合禮朕所以深嘉忠款遐想風規至於寢興不忘嘆矚勉弘令德用副誠懷達覽將軍等至省表其馬數共六千五百匹據所到印納馬都二萬匹都計馬價絹五十萬匹緣近歲以來或有水旱軍國之用不免闕供今數內且方圓支二十五萬匹分付達覽將軍便令歸國仍遣中使送至界首雖都數未得盡足然來使且免稽留



貴副所須當悉此意頃者所約馬數蓋欲事可久長何者付絹少則彼意不充納馬多則此力致歎馬數漸廣則欠價漸多以斯商量宜有定約彼此為便理甚昭然况與可汗禮在往來義存終始親鄰既通於累代思好益厚於往時所以萬里推誠期於一言見信遠思明智固體朕心其東都太原置寺此令入勾當事緣功德理合精嚴又有彼國師僧不必更勞人檢投其見撚拓勿施鄔達于等今並放歸所令帝德將軍安慶雲供養師僧請住外宅又令骨都祿將軍充檢投功德使其安立請隨般次放歸本國者並依來奏想宜知悉今賜少物

具如別錄内外宰相及判官摩尼師等並各有賜物至宜准數分付内外宰相官吏師僧等並存問之遣書指不多及

與韋丹詔

敕韋丹竇從直至省所陳賀并奏江饒等四州旱損其所欠供軍留州錢米等並已放免又奏權減俸及修造陂堰并勸課種時粟麥等事宜具悉朕頃緣時旱慮害農功雖推咎已之心敢望動天之德而未逾浹日膏澤霈然仰荷玄休俯增祗惕卿喜深稱慶忠切分憂既覽賀陳兼詳奏請至如蠲逋以卹人隱減俸以濟軍須抑



未業而移風務茲救麥防旱年而歉雨修利陂塘皆合其宜並依所奏非卿公勤奉上仁惻發中則共理之心不能至此再三興歎一二難申勉於始終以副朕意想宜知悉

與從史詔

敕從史史澣至省所陳謝具悉卿亡父早踐班榮久著聲績永言褒贈自叶典常况卿孝友承家勤勞事國念茲忠節皆稟義方將慰匪莪之心宜流自葉之澤豈為殊渥頻至謝草

答宰相杜佑等賀德音表

朕以春候發生歲功資始順陽和而布政賑貧乏而勸農載念罪人因除弊事隨其所利施以為恩富庶之端實漸於此卿等義敦宗戚誠竭君親省茲賀陳用增嘉歎

與孫疇詔

敕孫疇劉德惠至省所進隴右地圖兼進戰車陣圖車樣及秦陳收復河湟事宜者具悉卿尹茲右輔固乃西疆創制戎車繕修軍實思收故地誓立殊勳載覽陣圖兼詳所奏誠得開邊之畧益加報國之心斯謂盡忠彌增注意眷言所至無忘于懷



與李良僅詔

敕李良僅卿久在軍門習知邊事居常恭恪動必忠勤眷乃才良可分憂寄今授卿延州刺史兼安塞軍使并賜官告往延州既兼軍鎮且雜蕃戎防遏撫綏兩須得所宜勉所仕用副朕懷

答京兆府二十四縣耆壽謝賑貸表

朕勤求人隱恤郵農功念播植之時必資首種慮懸磬之日多乏見糧將便公私宜從歛散卿等名登庶老業守先疇各勉農人以副朕意所謝知

白氏長慶集卷第五十七終



白氏長慶集卷第五十八

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

奏狀一凡十首

初授拾遺獻書元和三年進

五月八日翰林學士將仕郎守左拾遺臣白居易頓首頓首謹昧死奉書于施辰音之下臣伏奉前月二十日恩制除授臣左拾遺前充翰林學士者臣與崔羣同狀陳謝但言忝冒未吐衷誠今者再贖宸嚴伏惟重賜



詳覽臣按六典左右拾遺掌供奉諷諫凡發令舉事有不便於時不合於道者小則上封大則庭諍其選甚重其秩甚卑所以然者抑有由也大凡人之情位高則惜其位身貴則愛其身惜位則偷合而不言愛身則苟容而不諫此必然之理也故拾遺之置所以卑其秩者使位未足惜身未足愛也所以重其選者使上不忍負恩下不忍負心也夫位未足惜恩不忍負然後能有闕必規有違必諫朝廷得失無不察天下利病無不言此國朝置拾遺之本意也由是而言豈小臣愚劣闇懦所宜居之哉况臣本鄉里豎儒府縣走吏委心泥滓絕望煙

霄豈意聖慈擢居近職每宴飲無不先及每慶賜無不先霑中殿之馬代其勞內厨之膳給其食朝慙夕惕已逾半年塵曠漸深憂愧彌劇未伸微効又擢清班臣所以授官已來僅將十日食不知味寢不遑安唯思粉身以荅殊寵但未獲粉身之所耳今陛下肇建皇極初受鴻名夙夜憂勤以求致理每施一政舉一事無不合於道便於時故天下之心顙顙然日有望於太平也然今後萬一事有不便於時者陛下豈不欲聞之乎萬一政有不合於道者陛下豈不欲革之乎候陛下言動之際詔令之間小有遺闕稍關損益臣必密陳所見潛獻所



聞但在聖心裁斷而已臣又職在中禁不同外司欲竭愚衷合先陳露伏希天鑒深察赤誠無任感恩欲報懇款屏營之至謹言

論制科人狀

近日内外官除改及制科人等事宜

右臣伏見内外官近日除改人心甚驚遠近之情不無憂懼喧喧道路異口同音皆云制舉人牛僧孺等三人以直言時事恩獎登科被落第人怨謗加誣惑亂中外謂為誑妄斥而逐之故並出為關外官揚於陵以考策敢收直言者故出為廣府節度韋貫之同所坐故出為

果州刺史裴垪以覆策又不退直言者故免內職除戶部侍郎王涯同所坐出為虢州司馬盧坦以數舉事為人所惡因其彈奏小誤得以為名故黜為左庶子王播同之亦停知雜臣伏以裴垪王涯盧坦韋貫之等皆公忠正直内外咸知所宜授以要權致之近地故比來衆情私相謂曰此數人者皆人之望也若數人進則必君子之道長若數人退則必小人之道行欲卜時事之否臧在數人之進退也則數人者自陛下嗣位已來並蒙獎用或任之耳目或委以腹心天下人情日望致理今忽一旦悉疎棄之或降於散班或斥於遠郡設令有過



白集 卷五十一  
猶可優容况且無瑕豈宜黜退所以前月以來上自朝廷下至衢路衆心洶洶驚懼不安直道者疚心直言者杜口不審陛下得知之否凡此除改傳者紛然皆云裴垍等不能委曲順時或以正直忤物爲人之所嫉孽本非聖意罪之不審陛下得聞之否臣未知此說虛實但獻所聞所聞皆虛陛下得不明辯之乎所聞皆實陛下得不深慮之乎虛之與實皆恐陛下要知臣若不言誰當言者臣今言出身戮亦所甘心何者臣之命至輕朝廷之事至大故也臣又聞君聖則臣忠上明則下直故堯之聖也天下已太平矣尚求誹謗以廣聰明漢文之

明也海內已理矣賈誼猶比之倒懸可謂痛哭一君皆容納之所以得稱聖明也今陛下明下詔令徵求直言反以爲罪此臣所以未諭也陛下視今日之理何如堯與漢文之時乎若以爲及之則誹謗痛哭尚含容而納之况徵之直言索之極諫乎若以爲未及則僧孺等之言固宜然也陛下縱未能推而行之又何忍罪而斥之乎此臣所以爲陛下流涕而痛惜也德宗皇帝初卽位年亦徵天下直言極諫之士親自臨試問以天旱穆質對云兩漢故事三公當免卜式著議弘羊可烹此皆指言當時在權位而有恩寵者德宗深嘉之自第四等拔



為第二等自畿尉擢為左補闕書之國史以示子孫今  
 僧孺等對策之中切直指陳之言亦未過於穆質而遽  
 斥之臣恐非嗣祖宗承耿光之道也書諸史策後嗣何  
 觀焉陛下得不再三省之乎臣昨在院與裴均王涯等  
 覆策之時日奉宣令臣等精意考覆臣上不敢負恩下  
 不忍負心唯秉至公以為取捨雖有讐怨不敢棄之雖  
 有親故不敢避之唯求直言以副聖意故皇甫湜雖是  
 王涯外甥以其言直合收涯亦不敢以私嫌自避當時  
 有狀具以陳奏不意羣心嗷嗷構成禍端聖心以此察  
 之則或可悟矣儻陛下察臣肝膽知臣精誠以臣此言

可以聽採則乞俯迴聖覽特示寬恩僧孺等准往例與  
 官裴均等依舊職獎用使内外人意歡然再安若以臣  
 此言理非允當以臣覆策事涉乖宜則臣等見在四人  
 亦宜各加黜責豈可六人同事唯罪兩人雖聖造優容  
 且過朝夕在臣懼惕豈可苟安敢不自陳以待罪戾臣  
 今職為學士官是拾遺日草詔書月請諫紙臣若默默  
 惜身不言豈惟上孤聖恩實亦下負神道所以密緘手  
 疏潛吐血誠苟合天心雖死無恨無任憂懼激切之至

論于頔裴均狀

于頔裴均欲入朝事宜



右臣聞諸道路皆云于頔裴均累有進奉並請入朝伏聞聖恩已似允許臣側聽時議內酌事情為陛下謀恐非穩便晝夜思慮不敢不言伏見貞元以來天下節將握兵守土少肯入朝自陛下刑服三兇威加四海是得諸道節度使三二年來朝廷追則追替則替奔走道路懼承命之不暇斯則聖德皇威大被于四方矣夫謀宜可久事貴得中當難制之時則貴欲令其朝覲及可制之日則不必使之盡來何則安衆心收衆望在調馭之得其宜也臣伏見近日節度使或替或追稍似煩數今又許于頔等入奏或慮便留在朝臣細思之有三不可

何者竊見外使入奏不問賢愚皆欲仰希聖恩傍結權貴上須進奉下須人事莫不減削軍府割剝疲人每入朝甚於兩稅又聞于頔裴均等數有進奉若又許來荆襄之人必重困於剝削矣奪軍府疲人之不足奉君上權貴之有餘伏料聖心知之深所不忍此不可一也臣又竊聞時議云近日諸道節度使或以進奉希旨或以貨賄藩身謂恩澤可圖謂權位可取以入覲為請以戀闕為名須來即來須住即住要重位即得重位要大權即得大權進退周旋無求不得天下節度使盡萌此心不審聖聰聞此議否今于頔等以入覲為請若又許



之豈非須來卽來乎既來必以戀闕爲名若又許之豈非須住卽住乎則重位自然合加况必求之乎大權不得<sub>不與况必圖之乎</sub>重位大權人誰不愛于頓既得則茂昭求之臣聞茂昭又欲入朝已謀行計茂昭亦宰相也亦國親也若引于頓爲例獨不可乎若盡與之則陛下重位大權是以人情假入也授之可乎若獨與彼不與此則忿爭怨望之端自此而作今倖門已開矣速杜之又令于頓等開之臣必恐聖心有時而悔矣其不可二也臣又竊見自古及今君臣之際權太重則下不得所勢人逼則上不甚安今于頓任兼將相來則總朝羌

之權家通國親入則連戚里之勢勢親則疎者不敢諫權重則羣下不敢言臣慮于頓未來之間內外迎附之者其勢已赫赫炎炎矣况其已來乎臣恐于頓未到之間內外合言者已不敢言矣况其已到乎脫或至此陛下有術以制馭之耶若用術制之不如不制之安也若又無術將如之何且于頓身是大臣子爲附馬性靈事迹陛下素諳一朝到來權兼內外若繩以規制則必失君臣之心若縱其作爲則必敗朝廷之度進退思慮恐貽聖憂其不可三也凡此三不可事實不細伏乞聖覽再三思之今臣所言皆君臣之密機安危之大計伏望



白集 卷五十一  
秘藏此狀不令左右得知况臣以疎議親以賤論貴語無方便動有悔尤言出身危非不知耳但以職居近密身被恩榮苟有聞知即合陳露儻言而得罪亦臣所甘心若默而負恩則臣所不忍伏希聖鑒俯察愚誠謹具奏聞謹奏

論和糴狀

今年和糴折糴利害事宜

右臣伏見有司以今年豐熟請令畿內及諸處和糴令收賤穀以利農人以臣所觀有害無利何者凡曰和糴則官出錢入出穀兩和商量然後交易也此來和糴事

則不然但令府縣散配戶人促立程限嚴加徵催苟有稽遲則被追捉迫蹙鞭撻甚於稅賦號為和糴其實害入儻依前而行臣故曰有害無利也今若有司出錢開場自糴比於時價稍有優饒利之誘人人必情願且本請和糴只圖利入人若有利自然願來利害之間可以此辯今若除前之弊行此之便是真得和糴利人之道也二端取捨伏惟聖旨裁之必不得已則不如折糴折糴者折青苗稅錢使納斛斗免令賤糴別納見錢在於農人亦甚為利况度支比來所支和糴價錢多是雜色匹段百姓又須轉賣然後將納稅錢至於給付不免侵



偷貨易不免折損所失過本其弊可知今若量折稅錢使納斛斗既無賤糶麥粟之費又無轉賣匹段之勞利歸於人美歸於上則折糶之便豈不昭然由是而論則配戶不如開場和糶不如折糶亦甚明矣臣久處村間曾為和糶之戶親被迫處實不堪命臣近為畿尉曾領和糶之司親自鞭撻所不忍觀臣頃者常欲疏此人病聞于天聰疎遠賤微無由上達今幸擢居禁職列在諫官苟有他聞猶合陳獻况備諳此事深知此弊臣若緘默隱而不言不惟上孤聖恩實亦內負夙願猶慮愚誠不至聖鑒未迴卽望試令左右可親信者一人潛問鄉

村百姓和糶之與折糶孰利而孰害乎則知臣言不敢苟耳或慮陛下以敕命已下難於移改以臣所見事又不然夫聖人之舉事也唯務便入唯求利物若損益相半則不必遷移若利害相懸則事須追改不獨於此其他亦然伏望宸衷審賜詳察謹具奏聞謹奏

論太原事狀三件

嚴綬 輔光

右嚴綬輔光太原事迹其間不可遠近具知臣前日對時已仔細面奏今奉宣輔光已替嚴綬續追此皆聖鑒至明左右不能惑聽合於公議斷自宸衷內外人心甚



為愜當其嚴綬早須與替不可更遲緣與輔光久相交  
結軍中補署職掌比來盡由輔光今見別除監軍小人  
乍失依託或恐嚴綬相黨曲為妄陳軍情事宜之間須  
過防慮伏望聖恩速令貞亮赴本道便許嚴綬入朝

貞亮

右貞亮原是舊人曾任重職陛下以太原事弊使替輔  
光然臣伏聞貞亮先充汴州監軍日自置親兵數千又  
任三川都監日專殺李康兩節度使事迹深為不可為  
性自用所在專權若貞亮處事依前即太原却受其弊  
雖將追改難以成功其貞亮發赴本道之時恐須以承

前事切加約束令其戒懼此事至要伏惟聖心不忘

范希朝

右希朝前在振武威令大行至今蕃戎望風畏伏况又  
勤儉信實所在士卒歸心今若太原要入無出希朝之  
右伏恐聖意慮其有年臣又訪聞希朝筋力猶堪駢使  
但且令鎮撫必愜軍情待其一二年間威制成立然後  
擇能者則必易守成規則雖老年事須且用其靈武比  
太原雖小亦是要鎮如納臣愚見伏恐便須擇入與希  
朝相代謹具奏聞

奏請加德音中節目

件二



緣今時旱請更減放江淮旱損州縣百姓今

年租稅

右伏以聖心憂軫重降德音欲令實惠及入無如減放  
租稅昨正月中所降德音量放去年錢米伏聞所放數  
內已有納者縱未納者多是逃亡假令不放亦徵不得  
况旱損州縣至多所放錢米至少百姓未經豐熟又納  
今年稅租疲乏之中重此徵迫人力困苦莫甚於斯却  
是今年伏望聖恩更與宰臣及有司商量江淮先旱損  
州作分數更量放今年租稅當疲困之際降惻隱之恩  
感動人情無出於此敢竭愚見以副聖心

請揀放後宮內人

右伏見大曆已來四十餘歲宮中人數稍久漸多伏慮  
駢使之餘其數猶廣上則虛給衣食有供億糜費之煩  
下則離隔親族有幽閉怨曠之苦事宜省費物貴遂情  
頃者已蒙聖恩量有揀放聞諸道路所出不多臣伏見  
自太宗玄宗已來每遇災旱多有揀放書在國史天下  
稱之伏望聖慈再加處分則盛明之德可動天心感悅  
之情必致和氣光垂史用美繼祖宗貞觀開元之風復  
見於今日矣非小臣愚懇不能發此言非陛下英明不  
能行此事如蒙允許便請於德音中次第處分謹具奏



白集 卷五十一  
聞伏待聖旨謹奏

論于頔所進歌舞人事宜狀

右臣三五日來聞於時議云前件所進者並是于頔愛妾被普寧公主闇欲選進今于頔所進事非獲已者臣未知此說虛之與實再三思之皆為不可何則于頔自入朝來陛下待之深得其所存其大體故厚加寵位知其性惡故不與威權中外人情以為至當在於于頔亦自甘心今因普寧奪其愛妾眾人既有流議于頔得以為詞臣恐此事不益聖德在臣愚見豈敢不言伏見陛下數月以來分別邪正所有制斷所有處置無不各於

公論無不愜於人情唯此一事實乖時體關於損益臣實惜之今道路云云皆有此說是于頔自進亦恐外人不知去就之間恐須却賜于頔內足以辨明聖意外足以止息浮詞又令于頔有所感戴臣所聞所見如此伏恐陛下要知輒敢密陳庶禪萬一謹具奏聞謹奏

論魏徵舊宅狀

李師道奏請出私財收贖魏徵舊宅事宜

右今日守謙宜令撰與師道詔所請收贖魏徵宅還與其子甚合朕心凡依來奏者臣伏以魏徵是太宗朝宰相盡忠輔佐以致太平在於子孫合加優卹今緣子孫



窮賤舊宅典賣與人師道請出私財收贖却還其後嗣  
 事關激勸合出朝廷師道何人輒掠此美依宣便許臣  
 恐非宜况魏徵宅內舊堂本是宮中小殿太宗特賜以  
 表殊恩既又與諸家不同尤不宜使師道與贖計其典  
 賣其價非多伏望明敕有司特以官錢收贖使還後嗣  
 以勸忠臣則事出皇恩美歸聖德臣苟有所見不敢不  
 陳其與師道詔未敢依宣便撰伏待聖旨謹具奏聞謹  
 奏

論王鏐欲除官事宜狀

右臣竊有所聞云王鏐見欲除平章事未知何故有此

商量臣伏以宰相者人臣極位天下具瞻非有清望大  
 功不合輕授王鏐既非清望又無大功若加此官深為  
 不可昨日裴均除平章事內外之議早已紛然今王鏐  
 若除則如王鏐之輩皆生冀望之心矣若盡與則典章  
 大壞又未感恩若不與則厚薄有殊或生怨望侍門一  
 啓無可奈何臣又聞王鏐在鎮日不郵凋殘唯務差稅  
 淮南百姓日夜無繆五年誅求百計侵削錢物既足部  
 領入朝號為羨餘親自進奉凡有耳者無不知之今若  
 授同平章事臣恐四方聞之皆謂陛下得王鏐進奉而  
 與宰相也臣又恐諸道節度使今日已後皆割剥生人



營求宰相私相謂曰誰不如王鏐邪故臣以為深不可也其王鏐歸鎮與在朝伏望並不除宰相臣尚未知所聞信否貴欲先事而言或恐萬一已行即言之無及伏惟聖鑒俯察愚衷謹具奏聞謹奏

論裴均進奉銀器狀

右臣伏聞向外傳說云裴均前月二十六日於銀臺進奉前件銀器雖未審知虛實然而物議喧然既有所聞不敢不奏伏以陛下昨因時臯念及疲人特降德音停罷進奉天意如感雨澤應期巷舞途歌咸呼萬歲伏自德音降後天下顙望遵行未經旬月之間裴均便先進

奉若誠有此事深損聖德臣或慮有人云裴均所進銀器發在德音之前遂勸聖恩不妨受納以臣所見事固不然臣聞眾議皆云裴均性本貪殘動多邪巧每假進奉廣有誅求料其深心不願停罷必恐即日修表倍程進來欲試朝廷嘗其可否何者前月三日降德音准諸道進奏院報事例不過四五日即裴均合知至二十六日進物方到以此詳察足見姦情今若便容果落邪計况一處如此則遠近皆知臣恐諸道依前從此不守法度則是陛下明降制旨又自棄之何以制馭四方何以取信天下臣反覆思慮深為陛下惜之伏准德音節文



白集 卷五十一  
除四節及肯條外有違越進奉者其物送納左藏庫仍  
委御史臺具名聞奏若此事果實則御史臺必准制彈  
奏諫官必諫宰相必論天下知之何俾聖政以臣所見  
伏望明旨云裴均所進銀器雖在德音之前恐四方不  
知宜送左藏庫收納如此則海內悅服天下歡心事出  
宸衷美歸聖德又免至御史諫官奏論之然後有處置  
在於事體深以為宜伏願聖心速賜裁斷謹具奏聞謹  
奏

白氏長慶集卷第五十八終



